

TIN PLAN PA LAGA SERA "NATURAL POOL"

Lo no por bay "Cura di Tortuga" of "Conchi" mas!

ORANJESTAD (AAN): "Entre Aruba y cielo tur cos ta posibel" esaki lo bay bira un dicho cu lo bay rond mundo pasobra kico mas no por ser haci na Aruba cu na otro pais no ta posibel?

Segun informacionnan cu DIARIO a haya di esnan cu ta core tour cu turistanan cu ta bishita Aruba, gobierno tin planea pa laga sera Conchi/ Cura di Tortuga/ Natural Pool manera cu mayoria hende na Aruba conce e bunita lugar aki, cu ta keda na e parti Noord di e costa di Aruba.

Algun ambtenaar di go-

bierno di Project Bureau lo a acerca algun chofer cu ta core tour cu turista, pa asina laga nan sa cu nan tin planea pa sera e caminda pa bay Conchi o sera Conchi por completo cu ningun hende por yega mas eynan.

Aparentemente tin tres Hulandes tambe den wega pa asina planea pa laga sera Conchi, relaciona cu un otro proyecto di proteccion di naturalesa.

A ser bisa cu jeepnan cu ta bay Conchi ta causa daño enorme na e naturalesa den

vecindario di Conchi y areanan cu ta ser uza pa yega na Conchi.

Esnan cu ta bay tur dia cu turistanan Conchi ta teme pa nan pan di cada dia pasobra si gobierno laga sera e caminda pa yega Conchi anto ayo entrada di placa!!

No tin proyectonan di urgencia mas grandi cu gobierno mester realiza prome, cu nan ta bay sinta pensa pa bin cu tur otro sorto di proyecto di parke aki y parke aya cu ta costa miyones?

Naturaleza y medio ambiente na Aruba enberdad pa decadanan largo a ser negligha barbaremente, pero actualmente pais Aruba tin problemanan y asuntonan hopi mas urgente pa atende cu proyectonan di naturalesa cu por warda.

No ta conoci si e proyecto di Conchi ta cay bao di Ministro Tico Croes pasobra Tico sigur no lo bay perhudica turismo na Aruba.

Asuntonan di urgencia nacional a corto plaso ta loke ta importante pa Aruba su pueblo y no proyectonan cu

no ta di vital importancia y pa cual no tin motibo pa nan mester ser ehecuta cueste loke cueste di inmediatamente.

Cuerpo Policial di Aruba mester di tur sorto di material y training pa su personal y gobierno ta haci bon di duna polis y otro departamentonan esencial den e aparato gubernamental atencion di urgencia prome pasobra asuntonan di urgencia no por ser teni atras.

E situacion y desaroyo di criminalidad ta un di e urgencianan mas grandi cu gobierno di Aruba mester atende lo mas pronto posibel.

No tin placa pa departamento di Ambulans y awor si tin placa pa laga sera Conchi?

Kico ta mas importante; inverti placa den training di personal y equipo nobo pa departamento di ambulans o gasta placa awor riba un proyecto pa laga sera Conchi?

Si enberdad bin resulta cu pa proyectonan di naturalesa si tin placa y pa servicionan den Salubridad Publico y tambe asistencia policial no tin placa, anto enberdad entre Cielo y Aruba tur cos ta posibel.

Diahuebs awor

RUMOR TA CORE CU EMPIRE INSURANCE LO CERA SU PORTANAN

ORANJESTAD (AAN): Tin hopi preocupacion e dianan aki den mundo di aseguro na Aruba, specialmente pa loke ta trata e futuro di Empire Insurance.

Informacionnan cu DIARIO ta dispone di dje ta indica cu hopi persona ta furioso, pasobra nan auto a worde kibra door di un persona cu tin aseguro di Empire, y te awe nan vehiculo no a worde drecha.

Hasta un Docter cu a bay busca e placa cu Empire Insurance debe pa hopi tempo caba, a bin tende di un empleado cu e lo no haya su placa mas, pasobra recientemente lo a declara e compania como 'bancarota'.

Na luna di December cu a pasa mes, e compania a keda cera pa dos siman largo. Awor tin rumornan fuerte ta coriendo den tur skina, cu Diahuebs 15 di Januari 1998, e lugar lo cera su portanan.

Awor e pregunta grandi di tur cliente ta: Kico lo para cu nan poliza di seguro cu a worde paga completamente caba? Unda nan mester bay pa haya informacion? Parce cu e empleadonan di Empire Insurance mes no sa kico pa bisa e clientenan.

Kizas esnan cu ya a paga nan Aseguro di Auto full caba a perde nan placa, y lo mester bay saca placa full di nobo pa paga un otro Poliza na un otro compania?

DIARIO a compronde cu Empire Insurance no ta ni miembro mas di e Asociacion IAA di Aruba.

Recomendacion ta pa tur cliente drenta den contacto sea awe mes cu Empire Insurance of cu nan broker, pa asina mira kico lo para cu nan poliza di aseguro, prome cu e fecha di 15 Januari 1998 yega.

Dos Mujeres

ORANJESTAD (AAN): Dos amiga a rabia formalmente cu otro. Esaki ta debi, cu e amiga a bin haya sa di 'affair' cu su amiga tin cu su amigo. Ta polis mester a presenta den pura na Pos Chikito Complex pa intermedia.

Aki e amiga a drenta pa asina kibra tur locual el a haya den cas di su amiga. Pa colmo nan ta bisiña di otro.

E amiga/bisiña perhudica a pidi Polis, pa nan papia cu su amiga y pa e keda na un distancia.

Locual ta trata e "Don Juan" no ta menciona nada relaciona cu e famoso cancion di "Dos mujeres".

FORMACION DI PARLAMENTO!!

